

摘藻堂四庫全書薈要

集部

欽定四庫全書薈要卷一萬六千六百十九

集部

大全集卷八

明 高啟 撰

七言古詩

唐昭宗賜錢武肅王鐵券歌

妖兒初下含元殿
天子仍居少陽院
諸藩從此擁連城
朝貢皆停事攻戰
岐王已去梁王來
長安宮闕生蒿萊
天目山前異人出
金戈雙舉風煙開
羅平惡鳥啼初起

犀弩三千射潮水歸來父老拜旌旗醺酒搥牛宴鄉里
擊毬駿馬驕春風錦袍玉帶真英雄詔書特賜誓終始
黃金鏤字旌殊功虎符龍節彤弓矢後嗣猶令赦三死
盡言恩寵冠當時天府丹書未踰此摩挲舊物四百年
古色滿面凝蒼煙天祐宰相署名在尋文再讀心茫然
古來保族須忠節受此幾人還覆滅王家勲業至今傳
不在區區一方鐵人生富貴知幾時泰山作礪徒相期
行人曾過表忠觀風雨斷蘚埋殘碑

太白三章

太白初升北斗落行人早起車鳴鐸豈願身離父母邦
山川路遠非不惡貧賤未知生處樂

太白正高北斗低行人出關雞亂啼他鄉無人足知己
欲歸未歸東復西弊裘愧見家中妻

太白猶懸北斗沒行人衣上霜拂拂下馬飲酒歌苦聲
新豐主人莫相忽人奴亦有封侯骨

江上看花

兩年京師不見花青衫白馬驅塵沙今年江邊偶無事
狂醉爛熳尋春華遊蜂飛蝶日妍暖紅紫正發紛交加
穿蹊每入鄰媪圃叩門或到山僧家漸老都無少年樂
底用簫鼓隨行車攀條繞樹對吟咏不忍歸去至日斜
花應得我相慰賞似笑欲舞爭矜誇我如無花亦寂寞
閉戶有酒誰能賒夜來茅屋臥聞雨曉起走看成咨嗟
飄英墮萼不可綴餘艷只似銷殘霞明知春色不久住
豈料便去難留遮野鶯啼罷一回首恨與芳草盈天涯

中秋翫月張校理宅得南字

八月望夜天如藍海色卷霧山收嵐玉盤元沉龍窟底
忽起萬丈誰能探初來空中光尚濕嬋娥寒髻風鬢鬢
人言一年此最好金精水氣秋相涵小星盡去大星在
芒角欲吐敢與叅天將洗眼照下土啖食肯縱妖墓貪
穿深窺暗不遺隙魍魎忌影逃巖嵌前年客中憶見之
家人怨別方喃喃荒山不知佳節至垂首凭案尋書蟬
但怪流輝入敗戶油燈失燄留孤龕起行陰林不用炬

剝啄獨叩峰西菴
虬蛇亂踏心膽悸
怪影走石皆楓楠
即呼道人共載酒
放舟直下芙蓉潭
翻翻驚鷗落樹杪
吹笛正和鳥飛南
今年在舍反寂寞
暗室困臥如僵蠶
乾愁無端負良夜
月固不言我則慚
人無賢愚競翫賞
况我清景性所耽
忽憶諸君隔河水
持被就宿聆高談
爲呼老婢掃庭宇
一席盤飮梨與柑
江城重閉萬家寂
樓鼓近聽纔撾三
空堦淒其覺露泣
虛牖窈窕疑煙含
婆娑欲留月伴影
素鸞西下煩停驂
明宵復出已難似

動別經歲嗟何堪尊前此月又此客世所難遇心應語
關山幾處未解兵擊柝不寐愁丁男南鄰歌舞北鄰哭
月雖同照異苦甘何人爲我揮天戈乾坤多難俱平戡
行者得還居者樂清光所及恩皆覃懸知此願未易遂
憂來舉盞從沉酣須臾衆散曉蟲急古桂吹落青毵毵
送王太守遷雲間

男屠猪羊女釀酒共禱神祠留太守太守今年遷大州
除書已下誰能留兩州相去無百里失君應愁得君喜

安得如君數十人一時盡福東南民

謝陳山人贈其故弟長司所畫山水

大髯袖中有廬霍嵐氣噴人寒色薄出贈生綃一幅圖
云是小髯之所作我嘗遊君伯仲間仲今已沒空見山
畫中無限礧礧意使我坐看愁滿顏重厓複澗迷樵路
煙蘿冥冥晝如暮溪閣風生醉客眠野橋月出歸僧度
櫪林蒙密楓林高深處似有猩鼯號滿空雲凍動秋思
飛泉落日何蕭騷揮毫若此難再得白鶴何時返鄉國

良工自古多苦心留賞人間賴遺墨
南宮北苑皆已仙此圖與之當並傳
坐嗟存歿意難報作歌愧匪瓊瑤篇
書夢贈徐高士

真人高居紫霞房靈津夜灌通桃康
其神不彫駐景光名籍早入丹臺藏
道成驂蚪面虛皇凌攝梵炁遨穹蒼
下視群生墮迷方倏忽起滅更喜傷
我嘗夢遊至其傍廣庭淨發衆妙香
仙媛神官儼成行坐考雲笈披琳琅
稽首歸依大醫王願憫濁世同淪亡
龍根珍脯不可嘗

但覺凡火燒肌腸身心俱病孰爲攘至言授我何敢忘
空山無人覺在牀海月未落天蒼茫佐卿化鶴來吾鄉
朱冠縞衣頰而長篋中活人何所將苓參朮芎枳桂薑
學仙曾聞道非常幸賜大藥和陰陽誓參飛裾上翱翔
人間徧施甘露漿掃除熱惱俱清涼疾苦不生壽無量

劉松年畫

樵青刺篙勝搖槳船頭分流水聲響青山渺渺波漾漾
白鷗飛過時一兩載書百卷酒十壺日斜出遊女兒湖

鄰舟買得巨口鱸醉拍銅斗歌鳴鳴此樂除却江南無
題武昌魏槃所藏畫

楚山遠吐參差碧虛閣開臨繫船石沙樹凋時鄂渚秋
江鷗沒處湘潭夕閣中幽人坐讀書書聲入水驚龍魚
欲吹短笛相尋去黃鶴磯頭好待予

送葉卿東遊

聞君辭家今幾年布衣綫斷芒屨穿江湖夢迴燈火夜
聽雨每憶山中田兵戈忽斷故鄉路雖有兩足歸無緣

上書願雪父兄恥盡地聚米籌山川居然無成困逆旅
白日但看孤雲眠時人不容禰生傲坐客豈信毛公賢
黃金已盡酒徒散壯士反爲兒女憐飢吟倚壁氣未餒
有似病鶻棲荒煙却欲南遊探禹穴僕夫整駕雞鳴前
波濤翻江畏飢鰐霧雨連海愁飛鳶相逢誰肯問憔悴
山水自爲窮人妍乾坤無家去何止飄泊不異迴風船
區區願君自愛惜今古遇合無非天亂離貧賤何足歎
王孫亦在道路邊我今豈少四方志讀書坐破牀頭氊

恩讎兩無欲誰報送子空歌寶劍篇

題韓長司所藏山水圖

參卿昔在西安幕騎馬看山時出郭終南泰華勢最高
橫作秋雲掃寥廓秦川漢苑萬里開酒醒望遠登荒臺
日斜渭上歸人渡岳暗關中飛雨來此處奇觀絕天下
何事歸來猶看畫畫中小景似江南黃葉漁村見煙舍
莫戀江南真故鄉尊鱸炊熟酒船香美人不是滄洲客
去去宜登白玉堂

煮石山房爲金華山人賦

山人不飯粳稻香笑指白石爲餽糧金華之石猶可食
元是舊牧初平羊荆榛拾歸夜深煮自言久服能輕舉
但令隨處有雲根不問青天旱無雨我生無力耕西疇
硯田欲枯抱飢憂便當從君學此術絕勝乞米監河侯
九日與客登虎丘至夕放舟過天平山

昨日風雨今日晴天意令人作重九登高未用憶龍山
弔古竟須尋虎阜秋清人稀葉滿寺屐齒無聲石苔厚

我來但欲問前王不知伯氣銷沉久下穿山骨葬弓劍
銀海夜寒空不朽樓臺荆棘今幾變英雄誰似青山壽
十年自歎在塵土雞鳴起逐途人走茲遊喜出世網外
相攜況是同心友盤梯共上峰頂塔欲觀東海攀北斗
中原不見鴻鴈來浮雲萬里空回首鐘聲催送晚出寺
棲鴉已滿祠前柳秋風吹林客醉時夕陽下嶺僧歸後
山留好月續清景乘興夜過漁村口放船不覺露沾衣
滅燭始看星在畱金陵酒熟來謫仙赤壁歌殘泣嫠婦

人生此樂信難得夢幻功名有時有他年何必問誰健
但令不負持螯手詩成底用刻山石爲寄龍門說空叟
明朝來借白雲泉淨洗從前千劫垢

夜發錢清

錢清渡頭船夜開黃茅苦竹聞猿哀客官釀酒水神廟
風雨滿江湖正來蒸飯炊魚坐篷底不覺舟行兩山裏
棹歌早過越王城東方未白啼鴉起

草書歌贈張宣

昔聞汝祖東吳精醉傳草聖醒而驚汝今能飲不滿杓
逸氣欲與相崢嶸高堂把筆若把槊長綃一拂悲風生
陰垂大澤雷雨過響破巨峽波濤傾颺遊絲罥晴晝
落落高斗回寒更飲猿連臂深澗絕飢鶻捩翅荒烟橫
自言靜裏觀萬物故能變化窮其情嗟余少本好劍舞
學書晚方從父兄終焉懶惰不得就塵滿硯田長廢耕
覽時撫事每有感胸次砒礮何由平空齋往往出怪語
吟聲相應飢腸鳴篇成請君爲我寫墨瀟灑鋒從奔崩

是時黃雲閉歲暮返照忽出寒江明手隨意到不留阻
正似突騎陰山行令巖不聞戈甲響一夜下盡名王城
安得師行亦如此頃刻坐見乾坤清嗚呼作歌聊贈汝
愈使流淚沾衣纓

獨遊雲巖寄周砥

城西諸山非不奇我遊獨與茲山宜紅櫻春開山後寺
白水夏滿山前陂幽居况與山不遠鐘鼓每到空齋帷
雨餘煙中落日下曳杖往讀頭陀碑兩厓蒼蒼石色古

枇杷樹高陰滿池殿燈欲昏上羣鼠塔鈴已靜蹲孤鷗
興來即遊興盡返迎送豈要山僧知困窮喪亂豈無感
正賴此境忘吾悲嗟君何爲乃自苦破羈短策塵中馳
挂帆能來亦未晚浦口三日南風吹

練圻老人農隱

我生不願六國印但願耕種二頃田田中讀書慕堯舜
坐待四海昇平年却愁爲農亦良苦近歲征役相煩煎
養蠶惟堪了官稅賣犢未足輸丁錢虬鬚縣吏叩門戶

鄰犬夜吠頻驚眠雨中投泥東鑿塹冰上渡水西防邊
幾家逃亡閉白屋荒村古木空寒煙君獨胡爲有此樂
無乃地邇秦溪仙門前流水野橋斷不過車馬唯通船
秧風初涼近芒種戴勝曉鳴桑樹顛短衣行隴自課作
兒子饑後妻耘前白頭雖復勞四體若比我輩寧非賢
旅遊三十不稱意年登未具粥與饘便投筆硯把耒耜
從子共賦豳風篇

嘗蒲萄酒歌

西域幾年歸使隔漢宮遺種秋蕭瑟誰將馬乳壓瑤漿
遠餉江南渴吟客赤霞流髓濃無聲初疑豹血淋銀甕
吳都不數黃柑釀隋殿虛傳玉薤名聞道輪臺千里雪
獵騎弓弦凍皆折試唱羌歌勸一觴羶房夜半天迴熱
絕味今朝喜得嘗猶含風露萬珠香牀頭如能有五斗
不將輕博涼州守

送高二文學遊錢塘

君梁人與
余異譜

我家本出渤海王子孫散落來南方只今遙承幾世後

坐棄戰陳談文章嗟君渡江此相遇知有遠族猶居梁
嘗聞四海盡兄弟況我同姓能相忘十年近舍道南宅
歲時拜父登高堂君年雖少志則壯不肯與世相低昂
讀書閉閣人罕識明月夜照聲琅琅欲將古道共推挽
豈顧薄俗譏迂狂君來不欲是王式我行或止非臧倉
亂離正賴相慰藉何事遠別遊錢塘錢塘舊國我所到
江山自存人已亡鴈鷺長雲暮陂澹牛羊落照秋陵荒
繁華銷盡莽蒼出君行見此能無傷西風吹塵扇難障

不如歸臥須時康一飢小事何足道故園尚有霜英黃

贈李外史

仙人飄飄若雲風來去倏忽誰能窮豈惟上界足官府
往往亦在塵埃中我欲尋真向五岳亂後舊路迷榛蓬
天雞未鳴夜谷暗海鶴已去秋壇空丹厓碧澗瑤草歇
洞府一闕無由通陌頭驚逢李道士自說柱史爲吾翁
傍人相傳解起死袖裏有丹如日紅我聞安期古策士
親見楚漢爭雌雄終然濁世不肯住渡海竟去先飛鴻

玄洲東望纔咫尺彩霞幻結金銀宮何當共赴食棗約
三花醉折春濛濛迴看城郭煙霧杳大笑下士真沙蟲

聽教坊舊妓郭芳卿弟子陳氏歌

時至正己亥歲作

文皇在御昇平日上苑宸遊駕頻出仗中樂部五千人
能唱新聲誰第一燕國佳人號順時姿容歌舞總能奇
中官奉旨時宣喚立馬門前催畫眉建章宮裏長生殿
芍藥初開勅張宴龍笙罷奏鳳絃停共聽嬌喉一鶯囀
遏雲妙響發朱脣不讓開元許永新繡陛花驚飄艷雪

文梁風動委芳塵翰林才子山東李每進新詞蒙上喜
當筵按罷謝天恩捧賜纏頭蜀都綺晚出銀臺酒未消
侯家主第強相邀寶釵珠袖尊前賞占斷春風夜復朝
回頭樂事浮雲改瘞玉埋香今幾載世間遺譜竟誰傳
弟子猶憐一人在曾記霓裳學得成朝元隊裏藝初呈
九天聲落千人聽丹鳳樓前月正明狹斜貴客迴車馬
不信芳名在師下風塵一旦禁城荒誰是花前聽歌者
從此飄零出教坊遠辭京國客殊方閉門春盡無人問

白髮青裙不理妝相逢爲把雙蛾戲水調梁州歌續續
江南年少未曾聞元是當時供奉曲朝使今年海上歸
繁華休說亂來非梨園散盡宮槐落天子愁多內宴稀
始知歡樂生憂患恨殺韓休老無諫傷心不見昔人歌
汾水秋風有飛鴈此日西園把一卮感時懷舊盡成悲
含情欲爲秋娘賦愧我才非杜牧之

牀屏山水圖歌

畫工知余愛青山久墮塵網無由還故將列岫寫屏障

使我臥起於其間從此長如宿清境枕上分明見峰嶺
爐烟曉入帳中飛擁被驚和白雲冷丹崖碧樹層層開
江雨還逐孤帆來就中樓閣是何處彷彿神女巫陽臺
楚山修竹瀟湘水似有清猿忽啼起江南千里夢遊歸
半牀落月高堂裏

方隱君山園

吳興城南山水勝竹樹參差萬家暎幽深誰似隱君園
車馬不來雞犬靜雨溪迴通柳港曲一峰立對柴門正

東西別墅憐更好孤棹往來隨晚興總令種菜不種桃
新製長鑱木爲柄家童頗解候天時鄰叟還能論地性
交交林路翳復開活活野泉流不定清晨聞鳥欣獨往
濃綠潑晴畦色淨老葉垂根孤蚓號殘英綴梗群蜂競
乍縈新蔓喜籬長欲迸晚芽嫌土硬此時採擷自足飽
肯爲食肝煩縣令古來名園悉可數金谷辟疆誇獨盛
鑿石圓開弄月池買花深作行春徑愛妾宵陪秉燭宴
狎朋晝接流觴詠長年歡樂豈知極迴首芳菲屬他姓

只今誰解問遺蹤
斷甃摧垣無一剩
乃知厚業要德守
那得衰榮但言命
君能勤儉遺子孫
應有佳名書郡乘
觀顧蕃所藏宋賜進士絲鞭歌

臚傳殿下呼名字
進士新充探花使
內人綰結綵鞭成
恩與宮袍一時賜
不用頻將柳下揮
馬蹄得意自如飛
影裊夕陽何處去
曲江園裏宴初歸
天街直拂花枝過
擇婿高樓彩毬墮
令人把玩憶當時
零落春風幾縷絲
憶昨行寄吳中諸故人

憶昨結交豪俠客意氣相傾無促戚十年離亂如不知

日費黃金出遊劇狐裘蒙茸欺北風霹靂應手鳴雕弓

桓王墓下沙草白彷彿地似遼城東馬行雪中四蹄熱

流影欲追飛隼滅歸來笑學曹景宗生擊黃獐飲其血

臯橋泰娘雙翠蛾喚來尊前爲我歌白日欲沒奈愁何

迴潭水綠春始波此中夜遊樂更多月出東山白雲裏

照見船中笛聲起驚鷗飛過片片輕有似梅花落江水

天峰最高明日登手接飛鳥攀危藤龍門路黑不可上

松風吹滅巖中燈衆客欲歸我不能更度前嶺緣峻嶒
遠攜茗器下相候喜有白首楞伽僧館娃離宮已爲寺
香逕無人欲愁思醉題高壁墨如鴉一半敬斜不成字
夫差城南天下稀狂遊累日忘却歸座中爭起勸我酒
但道飲此無相違自從飄零各江海故舊如今幾人在
荒煙落日野烏啼寂寞青山顏亦改須知少年樂事偏
當飲豈得言無錢我今自算雖未老豪健已覺難如前
去日已去不可止來日方來猶可喜古來達士有名言

只說人生行樂耳

明皇秉燭夜遊圖

華萼樓頭日初墮紫衣催上宮門鎖大家今夕燕西園
高懸銀盤百枝火海棠欲睡不得成紅妝照見殊分明
滿庭紫燄作春霧不知有月空中行新譜霓裳試初按
內使頻呼燒燭換知更宮女報銅籤歌舞休催夜方半
共言醉飲終此宵明日且免群臣朝只憂風露漸欲冷
妃子衣薄愁成嬌琵琶羯鼓相追續白日君心歡不足

此時何暇化光明去照逃亡小家屋姑蘇臺上長夜歌
江都宮裏飛螢多一般行樂未知極烽火忽至將如何
可憐蜀道歸來客南內淒涼頭盡白孤燈不照返魂人
梧桐夜雨秋蕭瑟

黑河秋雨引賦趙王孫家琵琶蓋其名也

胡天夜裂天垂泣雲壓鷹低翻翅溼王醉影抱寒驚
羶殿嘈嘈箭鳴急紅冰淚落青燈下倒卷河流入絃瀉
瘦駝卧磧歇鈴車朴朔陰沙鬼行野漢魂私語髣風淒

都護營荒咽凍聲蘭山木葉連愁起散入塞門三萬里
夢斷金蟾隔煙小青塚埋聲秋不曉

期張校理王著作徐記室遊虎阜

前身似是雲水僧餘習愛覓名山登最憐虎阜在平地
一丘勢敵千峻嶒缺厓深深翳密葉敲石兀兀纏危藤
昔年無事恣幽賞拄杖叩門來屢曾風廊聽竹移廣簟
雪屋煨芋明高燈禪堂素壁醉題滿老衲喜客無嗔憎
別來三載困塵土散落略盡同遊朋谷猿清叫煙霧隔

宵夢欲往天曹曹幽懷鬱抱不得寫一夜雨聲眠枕肱
相親尚有北郭友材盡齊楚慙曹滕張君名駒稟神駿
王子快鷗生鋒稜並淹客館校遺籍雲路萬里遠騫騰
徐卿亦是瑚璉器遠役又欲行擔簦明朝山鵲定鳴霽
跬步可遊何不能一林一澗幽景在遙想與昔無虧增
朱櫻綠筍雖已過正愛夏木陰層層欲營此行况甚易
婦有藏酒魚新罾出城不必借車馬已辦布韉青行滕
吾儕雖窮自有樂相聚皆比蟲夢夢亂離撥棄且勿道

願賦妙語留傳謄

廣陵孫孝子愛日堂

昔自中原兵甲動志士憂時久心痛千村殺戮雞犬無
骨肉誰家保相共揚州受禍聞最深徒恃堅城鐵爲甕
城中義丁一百萬坐委溝谿不成用至今草長髑髏臺
月黑精靈尚哀慟君時負親獨竄匿何異網魚逢脫縱
遠道秋風舊橐空長江暮雨孤帆重竭來吾鄉今十年
孝友爭傳比張仲雖嗟故里未能歸却喜新堂還可奉

盡歡惟啜小人羹致養寧須大官俸只愁老景苦駸駸
義馭西馳疾飛鞚晝看花影願遲移晚聽角聲驚早弄
長繩未解繫飛鳥每計餘年憂且恐嗟余少已失庭闈
宰木亂來無地種欲娛朝夕難再得誰惜流光去如夢
自慚不及君慶多灑淚蓼莪空廢誦寸心猶願時早平
重爲河清作歌頌萬國同看化日長生能養親死能送

贈胡校書奎

我初遇子東海濱苧衫蓆帽凌風塵登城觀濤共歎息

見者不識何如人歸時憶近看燈節孤舟夜過黃岡雪
書來書往道加餐幾日相逢五年別再會之計何悠哉
我未及去君能來秋風吹殘太湖水乘興上得吳王臺
吳王臺前白楊柳西施去後吳娃醜四海同爲此地人
百壺獨買誰家酒更尋豪客作夜遊簸弄明月琵琶洲
有愁爲君亦蕩滌何況我輩元無愁醉中狂談君可恕
且共周旋莫歸去秋光已算逼重陽好爲黃花三日住

溫陵節婦行

泉州陳氏婦夫泛海溺死守志

妾家溫陵近南浦嫁得良人業爲賈良人長年愛遠遊
不敢新妝映門戶販寶遙聞去百蠻朝朝海上望青山
不仁無那蛟龍橫漂沒孤舟不得還君非渡河老狂父
波濤如山何不顧尋屍便欲赴窮淵膝下嬌兒誰與哺
十載空闔守寸心滄溟水淺恨情深願身不化山頭石
化作孤飛精衛禽

荅余左司沈別駕元夕會飲城南之作時在園

中

青帝行春氣初播雲沍餘陰苦難破江頭碧草生未長
戰馬寒嘶斃殘莖炊煙冷落雨中溼鄰屋時聞有啼餓
我愁鬱鬱但欲眠冑以案書勤自課却思去歲屬無虞
元夕共歡人幾箇高堂細聽落梅歌手擘黃柑香噴座
客酬主勸總忘曉看盡繁燈逐星墮祇今照市但群蜂
樂事淒涼誰復作故人念我有二子省內郎官府中佐
別離兩月不相逢身佩弓刀從戍邏欲尋舊賞慰勞役

笑拂尊前且安坐老兵折簡走相呼謂我閉門無乃懦
黃昏遠就向城南敢惜春衫凍泥浣軍中有會異尋常
牛肉麤肥酒卮大胡奴帳下出琵琶復拊銀箏與相和
燭殘未聽荒雞號絃斷忽驚哀鴈過須臾顏熱起叫噓
不記亂離仍輶軻更聲析析繞旗門劒匣搯頭容醉臥
歸來又辱寄新詩錦水湔腸珠落唾豪吟自欲繼燕歌
悲調豈將同楚些覽之幾度感深情曲高和難非懶惰
我生無力本何用衣食自來供馬磨雖蒙鄉曲假虛名

正似南箕不堪簸君才於世俱可珍周賈東遊抱奇貨
艱危壯氣喜彌激利器未施寧忍挫頗聞原野多殺傷
風雪呻吟苦無那吾儕斯樂豈易得應愧皇天恩獨荷
明年此夕會昇平把酒相邀更相賀

江上晚過鄰塢看花因憶南園舊遊

去年看花在城郭今年看花向村落花開依舊自芳菲
客思居然成寂寞亂後城南花已空廢園門鎖鳥聲中
翻憐此地春風在映水穿籬發幾叢年時遊伴俱何處

祇有閒蜂隨繞樹欲慰春愁無酒家殘香細雨空歸去

兵後逢張孝廉醇

前年遠別君父子遭亂相傳皆已死今朝南陌忽逢君
爲識人中語音似君言從親渡海濤欲避兵禍辭官曹
間關僅得返鄉里脫命羅網真秋毫問我胡爲亦憔悴
十月孤城陷圍內艱難兩地得俱全政荷皇天憐我輩
相看握手非偶然痛飲豈得愁無錢城中故舊散欲盡
君來使我忘憂悵還思當年事未改車馬紅塵浩如海

等閒列第化秦灰試問主人誰復在請君看此應感吁
世間富貴皆空虛客遊且莫更彈鋏讀書歸臥先人廬
夜飲丁二侃宅聽琵琶

江月未出明星懸主人飲客夜不眠坐呼伶兒撥四弦
龍頭高撚玉軫圓轉關未奏蘆索先勞嘈咽切斷復連
澀如清澗溜凍泉細若碧樹吟秋蟬忽然繁急何轟闐
風沙滿把撒四筵鴈行驚起飛不聯浮雲落葉俱綿綿
一聲抹斷萬里煙夢入紫塞愁胡天問渠怨恨有幾千

口不能說指爲傳令人悵望思往年梁園楚榭長周旋
帷中曲宴羅綺鮮夜遣飛騎迎嬋娟低鬟出拜絳燭前
文絲香縚搭左肩曲項紫鳳抱半偏楓香一調妙入玄
好手正可羞紅蓮座間豪客皆詞仙舉杯邀我賦長篇
贈之醉寫蜀錦牋可當十萬纏頭錢如今遠客江海邊
欲聞絲音久無緣故人已散陵谷遷生死流落俱堪憐
今宵聽此真偶然顧影憔悴非昔妍長河欲曙落遠川
暫當歡娛反憂煎向隅無言涕淚漣此身如在潯陽船

曉睡

野夫性慵朝不出，弊簣蕭然掩閒室。
村深無客早敲門，睡覺長過半簷日。
林聲寂寂鳥鳴少，窗影交交樹橫密。
此時欹枕意方恬，一任牀風亂書帙。
昔年霜街踏官鼓，欲與羣兒走爭疾。
如今只戀布衾溫，悟從前計應多失。
廚中黍熟呼未起，妻子嗔嘲竟誰恤。
天能容老此江邊，無事長眠吾願畢。

東池看芙蓉

江天搖落逢秋杪滿目殘荷與枯蓼東家喜有木芙蓉
幾樹繁開依綠沼穠艷低將流水映寒香遠逐迴風裊
半愁霜露倚蒹葭老去徐娘猶窈窕天公似厭秋冷淡
故發芳叢媚清曉莫嗟不及見陽春車馬塵埃相汙少
吳王宮廢斷行客湘女祠空掩啼鳥何如此地獨來尋
靜對嬋娟散憂悄蘭舟雖無美人採日暮孤吟自行繞
明朝重到恐消魂零落紅雲波渺渺

謝廬山宋隱君寄惠所製墨

瓦篝自掃煙埃溼風雨空山杵聲急香爐峰前五粒松
燒成片玉玄香濃寄我團團未磨缺有如蝕盡天邊月
陶泓日暖水滿池雲氣忽起秋淋漓茅屋光寒客心懼
上有蛟龍欲飛去便思寫檄驚天驕夜磨楯鼻冰不銷
又思作賦獻天子曉出洛陽價增紙我今年少才不多
兩事未能如墨何但學顛狂如醉旭頭髮可濡秋未禿

美人撲蝶圖

花枝揚揚蝶宛宛風多力薄飛難遠美人一見空傷情

舞衣春來繡不成
乍過簾前尋不見
却入深叢避鶯燕
一雙撲得和花落
金粉香痕滿羅扇
笑看獨向園中歸
東家西家休亂飛

次韻周誼秀才對月見寄

空林鶴鳴草堂靜
桂影亭亭月初正
憐君幽臥對中秋
尊酒無人起相命
夜深詩成遣寄我
自訴窮愁兼疾病
嗟余比君愁更多
舊感新憂來每併
前年看月綠茗園
賓客當筵一時盛
自吹橫笛倚清歌
痛飲不知瓶屢罄

去年園中在北郭何異孤豚落深甯登樓強欲攬清輝

刁斗連營不堪聽今年旅寓向江渚暫喜東南亂初定

閒來未厭戶張羅貧去唯愁室懸磬牧兒耕叟共來往

那得衣冠解相敬久居村野坐自鄙銷盡豪懷與狂興

風塵無復舊時顏愧見相逢問名姓朋友凋零江海空

弟兄離隔關山迴良宵佳月雖可賞羸影窓間竟誰並


迢迢河轉漏初長撼撼葉鳴風稍勁此時倚壁自孤吟

只有蛩聲與相應初疑此月定非月應是人間照愁鏡

還思人愁月豈知何苦多憂損情性一生能幾見此月
盛年若去尤難更明宵圓景未便虧落盡芙蓉江色淨
君能強起從我歡共入空明恣游泳直期枕藉向舟中
不管遙天垂斗柄



大全集卷八



總校官庶吉士臣張能照

校對官檢討臣蕭九成

膳錄貢生臣郭棣泰

膳錄監生臣朱文佐

欽定四庫全書薈要

集部

大全集卷十九



欽定四庫全書薈要卷一萬六千六百二十

集部

大全集卷九

明 高啟 撰

七言古詩

姑蘇臺

金椎夜築西山土，催作高臺貯歌舞。
文身澤國構王基，却笑先人獨何苦。
銅溝玉檻成繁華，幻出峰頭一片霞。
望處直窮三百里，役時應廢幾千家。
蟠空曲路迷仙仗，

攀盡瑤梯繞到上外繞雕龍宛轉欄中施繡鳳歲蕤帳
熏爐長熱鬱金香共道千齡樂未央茂苑月來秋佩冷
洞庭雨過夏綃涼當窓衆妓如仙女揚袂迎風欲輕舉
人從天上見經過鳥向雲間驚笑語日暮橫塘花盡開
捲簾臺上望王來宴舟初自觀魚返獵騎還從射鹿迴
從登不用持鉞隊自列紅妝侍高會香傳羅帕進黃柑
縷切鸞刀供玉鱠燭光遠落太湖波驚起魚龍出沒多
城上烏啼河漢轉此時誰問夜如何管絃嘈嘈聒人耳

不聞兵來渡谿水欲攜西子走登舟醉倚畫欄嬌不起
瞑目無因到甬東可憐一炬綺羅空獻楮竟墮讎人計
賜劔應辜諫士忠客來試問遺宮路物色荒涼總非故
襖衣始信不虛言滿地荆榛見零露當年爭奪苦勞機
却把江山付落暉聞說越王臺殿上如今亦有鷓鴣飛

百花洲

吳王在時百花開畫船載樂洲邊來吳王去後百花落
歌吹無聞洲寂寞花開花落年年春前後看花應幾人

但見枝枝映流水不知片片墮行塵年來風雨荒臺畔
日暮黃鸝腸欲斷豈惟世少看花人縱來此地無花看
香水谿

粉痕凝水春溶溶煖香流出銅溝宮月明曾照美人浴
影與荷花相間紅玉肌羞露誰能見只有鴛鴦窺半面
絳綃圍掩怯新涼歸臥芙蓉池上殿空洗鉛華不洗妖
坐傾人國幾良宵驪山更有湯泉在千古愁魂一種銷

太湖石

沒人采石山根淵投身下試飢蛟涎馮夷不解護潛寶
幾片捧出如青蓮寒姿本是湖水骨波濤漱擊應千年
初疑鬼怪離洞府珊瑚鐵網相鈎連嵌空突兀多異態
雲吐夏浦芝生田龍鱗含雨晚猶潤豹質隱霧朝常鮮
清音叩罷磬韻遠微靨洗出珠窩圓坐移各岫置庭砌
日照彷彿生紫煙三峰削成泰華掌一穴透入仇池天
醉中時到倚蒼蘚秋風冷逼吟詩肩洛陽園墅汴宮苑
當時駢列誇奇妍黃羅封蓋素纒裹萬里貢獻勞車船

奢游事歇家園廢盡仆荆棘荒池邊人生嗜此亦可笑
有身豈得如石堅百年零落竟誰在空品甲乙煩題鐫
又嗟此石何獻巧自名鑿取虧天全不如頑礪世所棄
滿山長作牛羊眠

洞庭山

朝登西巖望太湖青天在水飛雲孤洞庭縹緲兩峰出
正似碧海浮方壺嘗聞此山古靈壤蛇虎絕跡歡樵夫
濤聲半夜恐魂夢石氣五月寒肌膚居人彷彿武陵客

戶種橘柚收爲租高風欲起沙鳥避明月未出霜猿呼
中有林屋仙所都銀房石室開金鋪羅浮峨眉互通達
別有路往非人途天后每降龍垂胡神鉦忽響驚棲颺
自懸日月照洞内古木陰蔽空朝晡風吹白芝晚易老
雲帶紫泉秋不枯靈威丈人亦仙徒深入探得函中符
玄衣使者不暇惜欲使出拯蒼生蘇後來好事多繼往
石壁篆刻猶堪摹千年玉鼠化蝙蝠下撲炬火如飛鳥
玄關拒閉誰復到似怪衣上腥塵汙勿言神仙事恍惚

靈蹟具在良非誣我生擾擾胡爲乎坐見白髮生頭顱
久欲尋真未能去局束世故緣妻孥何當臨湖借漁艇
拍浪徑渡先雙鳬獨攀幽險不用扶身佩五岳真形圖
夜登天壇掃落葉自取薪水供丹爐此身願作仙家奴
不知仙人肯許無狂語醉發應盧胡

聖姑廟

湖心湧出龜頭山白波翠島非人寰清虛宜作水仙府
鱗堂荷屋居其間淵都群靈孰爲主煙鬢翛然一神女

柔姿誰敢狎相親笑叱鼉龍起雷雨玉骨蟬輕蛻幾秋
世緣已斷信無愁采蘭每約湘濱會拾翠時陪漢上游
水禽翔鳴衛芝蓋長在蒼茫杳冥外鮫人獻綃裁作衣
螺女供珠綴爲佩花落閒祠謝古春蕙幃瑤席掩香塵
空山夜夜星河遠芳渚年年蘅杜新霞舒霧捲凝光彩
笑語無聞復誰待冷風幾度引舟迴宛似蓬萊隔煙海
猿叫楓林魚躍波桂旗翻翠暮寒多女巫佇望飛袞度
獨奏篳篥引曼歌椒觴奠罷沈玄壁鳥沒遙天湛空碧

遺情不結楚臺雲世人何處尋蹤跡

蔡經宅

崑崙主者王方平身騎黃麟朝紫京舉手長辭漢公卿得
道不願世上名往來隱玄與朱明洞中各有白玉城絳衣
游空擁幢旌三山五嶽自按行冷風吹動天樂鳴璫簫琅
璈和鸞笙羽衛蹀躞踏山海崩龍車鶴馭紛相迎嘯呼神官
走吏兵魑魅魍魎號且驚暫來經家駐雲程人馬不見但
有聲虎頭顰囊佩蒼精神光赫然照軒楹授以至言可長

生凡骨已作蟬蛻輕麻姑來會隨仙盟芳姿娉婷似飛瓊言
從昔年宴蓬瀛又見弱水三淺清爪可爬背念始萌仙意
已識遭笞榜餘杭阿姥酒罷傾攝景忽去煙雲橫家人悲
望空惻惻桑田回首幾變更神仙在世每自呈凡夫不識
等瞽盲丹元有田不解耕但愛狗苟還蠅營榮華未滿咎
責盈忽化腐鬼歸荒塋金丹可學道可成木鑽石盤貴精
誠誰能自拔水火坑飛游往來瑤樹英千載或有歸來情

石崇墓

蚪鬚欲怒珊瑚折步障圍春錦雲熱真珠換妾勝驚鴻
笑踏香塵如踏空酒闌金谷鶯花醉衆逐樓前舞裙墜
財多買得東市愁羅綺散盡餘荒丘猶憐白首同歸者
坐伴遊魂楓樹下

初入京寓天界西閣對辛夷花懷徐七記室

去年寺裏開辛夷君來憶我曾題詩今年我來君已去
思君還對花開時欲尋花下君行迹日暮空庭古苔碧
殷勤把酒問花枝看過春風幾行客

答余新鄭

前年吳門初解兵君別故國當西行有司臨門暮驅發
道路風雨啼孩嬰倉黃不敢送出郭執手暫立懷憂驚
我時雖幸脫鋒鏑亂後生事無堪營移家江上託地主
閒園借得親鉏耰春朝起沐日照屋野卉雜發鳴鸝鷯
思君萬里不可見對此涕淚如盆傾有壺當軒忍自酌
有句在卷邀誰評走投北郭問消息一客爲我言分明
君初隨例詣闕下有旨謫徙鍾離城賫無囊金從無僕

棄家獨去何惻惻長淮粘天趣前渡牙眼怖客浮鼉鯨
到州鞠躬謁太守脫去官籍儕編氓城荒無屋寓來客
旋乞廢地誅蓬荊異鄉何人恤同患喜有楊子兼徐卿
日高破竈煙未起閉戶不絕哦詩聲去年聖恩念逐客
特賜拂拭加朝纓勅君赴汴聽銓擢路算舊驛猶千程
沙河無雨夏雲熱茅葦夾岬多蚊蟲舟中感癘得下泄
刃攪腸腹聞咿嚶荒途無藥相救療伏枕兩旬幾殞生
終藉神明佑吉士疾勢漸脫身強輕一官署作新鄭簿

捧檄已去詢田更我雖歷歷聽客語虛實未察憂難平
初春天子下明詔欲纂前史羅儒英菲才亦辱使者召
辭謝不得來南京日斜出局訪君舍草滿陋巷春泥晴
入門小女識父友延拜學訴艱難情且云父意念家遠
新遣兩卒來相迎須臾出君寄我札上有秀句如瑰瓊
自陳前事頗一一與客舊說無虧盈讀終呼卒問彼土
卒言幾年經戰爭河山蕭條縣雖小民少奸詐多淳誠
春秋古稱鄆子國溱洧水活魴魚蘋雉兔咻咻草間走

雄雉角角桑顛鳴谷深稀逢種田者時有射戶棲山棚
霜天赤棗收幾斛剝食可當江南杭官來撫民務無事
鞭挂壁上無敲榜寒廳吏散獨坐嘯遠對嵩少當檐楹
聞之離抱頓舒豁如吸清露醒朝醒便因卒還寄君語
此邑小鮮聊試烹幸逢昌朝勿自棄願更努力修嘉名
吾皇親手擁高筭洒掃六合氛塵清海中夷筐已入貢
隴外戶版初來呈大開明堂議禮樂學士濟濟登蓬瀛
大廟冬烝薦朱瑟千畝春藉垂青絃用材不肯略疎賤

銖寸盡上天官衡况君磊落抱奇器不異一鶚秋空橫
豈容久屈簿領下天道始塞終當亨文章期君歸黼黻
借問報政何時成

送林謨秀才東歸謁松江守

江城秋陰朝不暉落葉古巷人來稀林生何求乃過我
敗屐躡雨投閒扉自言少習澤宮射思侶衆士登王畿
風塵失路因漂轉我豈無志時其違欲充材官挽強弩
關塞莫解窮城圍將從隱者服短褐霜露難采荒山薇

長年旅舍破氊冷坐厭蟋蟀愁伊威諸侯得意盡輕客
顧影竟傍何門依南津昨夜砧杵動風來燭前驚攬衣
家人倚戶望應久宿春未辦悲慙歸今朝江帆偶東轉
願借子語爲光輝嗟余亦坐窮作祟讀書不出遭罵譏
士無賢否貧者鄙此言信矣誰云非囊乏黃金可揮贈
有詩豈救君腸飢雲間使君本儒者貴顯尚肯矜寒微
儻開深池養病鵠翼成待看摩天飛

題高彥敬雲山圖

尚書生長金臺下慣識風沙草漫野何由得見山水鄉
煙嶺雲林遠能寫平時四海作宦遊高興最愛江南秋
雪谿清曉剡谿晚閒解狂轡尋扁舟此中謝屐曾經處
半是啼鴉棲宿樹斷橋旗下問農歸遠寺鐘邊訪僧去
風流一沒歲未遙坐覽遺迹成前朝何當遍覽畫中景
聖恩已許從漁樵

美人摘阮圖歌

圓槽象月修寒玉暗貯宮商滿空腹美人和恨抱秋風

偷寫琴中舞鸞曲
傾鬟低黛幾娉婷
夢約湘娥倚竹聽
滴盡冰盤老鮫淚
阿咸帳底醉初醒
梧桐落翠萎蘭紫
仙澗流雲含玉子
甲屏難障夜深寒
恐踏驚鴻忽飛起
不識人間出塞聲
瑤臺別有斷腸情
調終人去哀絃歇
桂樹烏啼滿山月

贈丘老師

長春之孫自仙骨
袖有蟠桃食遺核
平生不學燒汞方
唾視黃金等何物
滿城誰識舊庚桑
白髮人中似鶴長

時上高樓惟獨醉榴皮書破壁塵香

玄武門觀虎圈

目光燿燿卧深圈羽林獵士初擒獻腥風一嘯猶辟人
況在空山道中見莫憶橫行藜藿間且隨玄豹守天關
垂頭食肉嗟何補漢家將軍乃真虎

送許先生歸越

天子下詔徵賢良多士競逐風雲翔先生亦隨使者起
闕下再拜陳封章自稱前朝老進士白髮已短材非長

羣龍在廷翊昌運疲蹇豈足追騰驤乞還山林養餘齒
歌頌聖德傳無疆近臣上殿爲陳請天語特許歸其鄉
是時海國風雨涼道士莊下初栽秧故山農事不可緩
歸興倏與高帆揚從容進退遂所願帝恩甚大誰能量
嗟余相逢恨苦晚忽去未免私心傷明朝相憶望於越
江水東逝何洋洋

送證上人住持道場

訢公昔年住寶坊龍象蹴踏騰毫芒袈裟曾侍玉座傍

萬衆闐聽講仁王弟子如雲來四方朝鐘暮鼓鳴高堂
西歸蔥嶺今幾霜鉢傳曇師道彌昌叢林主教遇聖皇
紫衣朝闕隨班行上人繼吐三葉芳衲中長繫摩尼蒼
人間萬念俱已忘獨好遊戲談文章我來京師寄禪房
每邀看月開修廊手橫蠅拂坐繩牀竹間風吹煮茗香
侍僮觸屏睡欲僵高殿宿鳥驚琅璫詩成金磬韻尚揚
清才未必慙支湯有時夜剪園韭嘗燈懸西齋雨浪浪
人生聚散不可常翩然東遊主道場道場乃在雲水鄉

碧瀾堂前去路長江湖寒縮蛟蜃藏楓柏正赤橙柑黃
煙銷日出聞漁榔洲渚宛轉山低昂蕭然瓶錫隨經囊
留宿肯戀林中桑兵餘莫嗟梵宇荒勝景未逐樓臺亡
寺門無人閉夕陽芋栗收作山中糧好說千偈恢禪網
麾斥佛祖誰敢當我方無用廩太倉叨逐劔佩趨明光
醉歌欲覓玄真狂懷恩未得尋歸航明朝舉首空相望
雲飛笠澤天茫茫

送王孝廉至京省其父待制後歸金共十

君來金陵自金華遠道輦确驅行車空山北風正多雪
歲晚何事穿泥沙君言省覲敢辭苦況是日下非天涯
問安已畢起稱壽白門酒香還可賒明燈客窗共夜語
便覺春意迴寒槎予亦叨恩在京國早踏街鼓聞初撾
日斜歸來就空廨索寞不異投林鴉家人千里望未至
虛聽檐鵲鳴喳喳羨君父子此相見頓起歡笑忘咨嗟
異鄉逢人即可樂况爾骨肉誰能加汝翁文章擅當世
片語落紙爭傳誇身登昌朝列侍從日曳珮玉趨南衙

捧函當殿曉進史秉燭鎖院宵書麻觀君才氣已略似
青海異種多騶駟絲綸便可令世掌胡爲趣別東還家
阿婆在堂待調膳計日敢使歸期差往來兩地慰親念
如君孝意誠堪嘉勞勞亭下冬日短江冰未解魚難弋
送君揖手忽已遠烏巾獵獵風中斜重闥歸拜想無恙
故園正見開梅花

穆陵行

永穆陵宋理宗陵也在會稽元至元初西僧楊

發輦真住請發宋諸陵許之既取其殉寶復以
理宗頂骨爲飲器後籍入官以賜帝師天兵克
元詔求得之命有司歸葬焉

樓船載國沈海水金槌盡入三泉裏空中玉馬不聞嘶
日落寢園秋色起魚燈夜滅隧戶開弓劍已出空幽臺
髡胡暗識寶氣盡六陵松柏悲風來玉顱深注酖酥酒
誤比戎王月支首百年帝魄泣穹廬醉骨飲冤愁不朽
幸逢中國真龍飛一函雨露江南歸環珮重遊故山月

冬青樹死遺民非

世傳有士嘗竊諸帝骨埋屏處樹冬青爲識

千秋誰解鋤

南山世運興亡覆掌間起輦谷前馬蹄散白草無人澆
麥飯

獨遊山中憶周記室砥

借居水北鄰雲巖醒遊醉臥月滿三空山孤愁似放逐
踐蛇衝虎窮幽探緣梯上窺萬仞壁垂綆下汲千丈潭
幽蘿翳壑變朝晦怪卉發澗留春酣青山識我豈生客
曾與周子來聯驂是時秋高鶴聲厲霜降兩崦纔收柑

飯餘洗足上堂坐手揮談麈風颺颺如今故人亦遠去
帆葉暮落吳江南斷崖蒼蘚漫舊刻往夢追想情何堪
巴僧不厭客屢至篝燈夜禪同一龕風迴忽灑石門雨
日出盡消瀑布嵐乃知山水有深趣天意獨許窮人諳
我今豈是慕高隱非才濫進能無慙業緣種種去略盡
惟有佳句猶相耽便求安心向佛祖不待婚嫁女與男

贈墨翁沈蒙泉

南朝墨法稱奚家相國謬費盈連車堆金欲沽世已少

至今好事成咨嗟潘生後出亦奇絕峨嵋仙子嘗相誇

紫殿曾供寫飛白玉堂每用書官麻人間留藏敢輕試
傳玩正比雲龍茶沈翁遠得二子妙珙壁自美誰能瑕
徂徠老節燒欲盡萬杵夜搗玄霜華錦囊贈我忽在几
光怪迸屋驚早鴉一餅團團未磨缺似月食盡逢妖墓
此物宜歸大手筆濡染竹帛垂無涯上當紀頌聖功德
下可論載臣忠邪我今才薄況病退破硯久棄塵生窪
一朝得此復何用慚註魚豕箋蟲鯁摩挲忽動揮灑興

聊吟險句追島叉高堂淋漓爲君掃醉汗舊賜宮袍花
淮南張架閣家舊有樓在儀鑾江上經兵燹已
廢與余會吳中乞追賦之

秋風嘗歌遠遊篇樓中舉手招飛仙山奔海瀉盡供覽
逸思每出孤鴻前雕欄一別應非昨幾度淮南桂花落
酒酣却作望鄉人那得東歸似黃鶴風景如今總厭看
客愁何處更凭欄欲問日邊知遠近浮雲回首蔽長安

題米元暉雲山圖

海岳老仙非畫工自有丘壑藏胸中大兒揮灑亦莫比
妙趣政足傳家風敷文閣下書幃淨夢入空山覺衣冷
起拈綵筆寫幽蹤一片飛來楚雲影彷彿三湘與九嶷
翠峰猶抹二娥眉水生江上鴻歸後樹暗沙頭春去時
蒼蒼遠渡連平麓煙火參差幾家屋林深谷靜斷行人
唯有禽聲啄枯木偶向高齋玩此圖斷縑猶費千金沽
自緣絕筆人間少如此雲山何處無

題朱氏梅雪軒

石城山居梅萬塢冒雪曾來扣僧戶爛然如見會群妃
白鳳繽紛下瑤圃數片輕吹著鬢華乍看是雪又疑花
迷魂亂眼春如海那辨南枝映竹斜獨披鶴氅穿林去
凍壓寒梢應幾樹聽響方知夜灑時聞香始識繁開處
回首春風憶舊遊夢尋歸路隔羅浮年來驢背無詩思
醉踏塵埃空自愁聞道君家谿上下玉蘂瓊英巧相亞
履跡誰來東郭朝笛聲不起南樓夜翠羽驚啼莫怨猜
破寒宜共一樽開雪晴花發須相記我亦扁舟乘興來

和衍上人觀梅

籃輿偶出青山郭寒雨初晴凍雲薄梅花一路幾千株
半發園林半邨落夜窗轉曙雞欲驚寒谷回春蝶應覺
浩蕩才迷醉客魂嬋娟更伴幽人樂我來如蝶東西飛
不敢題詩慙筆閣歸來落月照書屋重覓餘馨夢難托
高僧已澄法眼觀也愛一枝供寂寞便拖藜杖敲竹扉
遮莫人嗔賓客惡風雨休嗟已亂飄世間何物長如昨

題李德新中宗射鹿圖

赭袍玉帶虬髯怒人如真龍馬如虎英風猶似天可汗
肯信昏孱困韋武上林草綠聞呦呦飛鞚壁歷梢長楸
畫旗圍合晚猶獵後庭雙陸誰行籌追遊不記房陵辱
五王謫來勢猶獨空誇大羽發無虛不射妖狐射生鹿
畫圖令人生感嗟天寶回首飄胡沙神孫早解習祖藝
不遣銜出宮中花

題趙希遠萬松金闕圖

長松掀髯若群龍下繞宮闕雲千重鳳凰山頭望前殿

翠濤正涌金芙蓉海門日出潮初上白鶴飛來近仙掌
百官候綴紫宸班露滴朝衣氣森爽漢宮楊柳唐宮花
容易零落空繁華何如可獻至尊壽茯苓美似安期瓜
鑾輿因戀湖山好樓閣清陰勝蓬島不知風雨汴陵前
虜卒新樵幾株倒當日榻前初進圖黃金趣賜聞傳呼
何年流落在人世父老猶看思舊都客行近過吳山下
落葉空林惟敗瓦豈無畫史似前人秋色淒涼不堪寫

芥舟詩

估客海上誇乘風大舩遠戛龍魚宮帆如乘雲落天外
不假羽翼行虛空驚濤拍山撼難動安臥每到扶桑紅
回頭却笑垂釣子斷溝老葑留孤蓬烏知達人解衣表
坐視大塊舟航同風輪晝夜不停轉元氣下載浮鴻濛
泰山亦與一塵等何以巨細論雌雄君今齋居何苦小
自比置芥坳堂中將身便欲入無間險語乍出驚愚蒙
我聞懸珠納萬象此事尚覺勞神功萬千毫髮盡非有
幻象欲別誰能窮君行莫鼓萬里舵天游閉戶隨西東

何須更待積水厚區區往問南華翁

題周遜學天香深處卷

仙芬染骨濃無跡秋入畫堂簾不隔夢尋老蟾煙霧迷
碎落金蟲夜愁寂素娥舊栽無兩叢萬古散吹秋滿空
熏爐不熱象籠火人倚畫欄清影中蕙蘭暗泣幽馨歇
只有瑤芳占涼月

象

海山巨獸堪乘戰番使前年遠來獻寶纓纏絡錦襜垂

拜舞如人向金殿仙仗時巡出鳳城鑾輿頻駕不曾驚
有牙莫畏焚軀禍天子深仁愛爾生

題茅叟夏山過雨圖

前山冥冥雲欲開後山隱隱猶聞雷江南六月風雨過
樹暗不見巫陽臺奔湍衝斷石橋路下瀉谷口相喧聒
陰開林壑鬼神去氣溼古洞蛟龍回人家出門看新霽
泥封墜果多楊梅漁樵欲歸謂已暝返照石壁蟬鳴哀
山中此景誰解寫茅翁素有丹青才新圖一片似海岳

高堂未展涼先來嗟余久逐揮汗客
席帽障日趨黃埃問翁幾欲東遊去
如此畫圖安在哉

偃松行

松在太平山
獅子巖下

龍門西岡魏公祠祠前有松多古枝
長身蜿蜒橫數畝巨石作枕相撐撐
春泥半封朽死骨凍蘚盡裂皴生皮
無心昂聳上霄漢偃仰獨向荒山陲
蟄雷破嶽撼不動千載一夢醒何遲
政如臥龍未起日深意有待風雲期
太湖月出照夜魄天峰雪積埋寒姿
濤聲時吼若鼉息

野老驚起山僧疑左伸右屈多異態天自出巧非人爲
畫師安能把筆寫樵子豈敢操斤窺杜陵枯枿已憔悴
蜀相老柏非瑰奇何如此樹怪且壽呵衛定想煩靈祇
不知已閱幾人代游客過盡今存誰明堂屢興不見取
得全正愛同支離我嘗來觀忍遽返醉坐其上高吟詩
葛陂筇竹亦騰化神物終去可久羈何當一叱使飛起
載我萬里遊天池他年還訪舊城郭正是白鶴歸來時

白馬澗

白馬何不居天閑乃在古寺長松間竒姿不受世羈絡
遠自竺國馱經還澗邊飲罷寒雲起恍惚化龍跳入水
空山夜雨不聞嘶埋沒蹄痕紫苔裏高僧一去今幾年
世上神駿還誰憐莫令老逐風塵子憔悴哀鳴途路邊

贈治冠梁生乞作高子羔舊樣

野人散髮秋半稀小冠宜著稱短衣清時無能恥恩澤
朝簪乍脫歸田扉進賢我我在頭上此物須當付卿相
閉門方欲誦詩書煩君爲製依我樣

賦得烏衣巷送趙丞

差差舞羽多光彩鄉國初辭度雲海江南門巷有題名
識得當年故巢在春風三月滿京華肯入尋常百姓家
隨鶯已度龍池柳引蝶還穿鳳苑花綠蕪芳草長干渚
樓閣初晴社前雨江邊今日有離宮留人看上橋頭語
宿蔡邕夜起

四更雞叫七星爛獨起開門候天旦月掛愁邊人影低
風驚夢裏烏群散孤舟嫠婦寒自泣破屋老農貧屢歎

早餐欲發未遑安客路飄零正多難

天閑青驄赤驃二馬歌

漢家諸將開經濟列宿儲精降人世天遣同成一代功
亦有房星化騏驎青驄剪髮高作花赤驃灑汗微成霞
人間何處得奇種恍惚西至踰流沙年來百戰從天子
曾逐烏騅到江死不慙飽食玉山禾天廡時清少鞭使
周王八駿去不來唐帝六馬應凡材何如二龍總超絕
蹴踏四海荆榛開圉官雙鞚頻迴顧萬里長楸恐驚鶩

嘶處秋生閭闔風浴時曉動昆明霧一匹前牽一匹騎
馳道每出隨龍旗態閒步穩識上意不敢搖頓黃金羈
昨看巡狩還都邑鏡吹聲催移仗急羽林萬騎從如雲
追逐飛塵豈能及嗟哉此馬不異人乘時際遇蓋有神
請看垂耳鹽車者那得昂藏八尺身

同謝國史遊鍾山逢鐵冠先生

日日城中望鍾山孤塔縹緲峰孱顏山靈嘲我不一到
但命俗駕趨塵闌聖恩今朝許休沐得與謝客同躋攀

出郭未至景已好松風一派連清灣空林無人遇釋子
知有曲徑通禪關舉頭見寺去尚遠鐘磬響落浮雲間
登高不知已幾里但怪力盡愁辛艱衆山雜沓總在下
如擁劒珮趨朝班時當嚴冬雪始霽古木寒瘦泉流慳
梁僧遺墓臥殘碣宋帝廢墀埋深菅六朝陳蹟不可問
但見石老莓苔頑豪華歇盡形勝在劫火幾度燒空殷
鐵冠先生有道者往往人見騎黃斑相迎爲指幽絕處
淪茗留坐聽潺湲莫嫌癡客暮未返日墮江水鴉飛還

欲營一遊豈易得長來不比山僧閒

喜家人至京

家人遠來如我歸骨肉已是鄉園非妻羸女病想行苦
塵土覆面風吹衣裝車日暮解牛輒呼燭買酒敲鄰扉
客懷乍見不得語一室相對情依依憶昨初蒙使者徵
遠別田舍來京畿小臣微賤等蟣蝨召對上殿瞻天威
詔從太史校金匱每旦珥筆趨彤闈春遊禁苑侍鶴駕
冬祀泰時隨龍旂有時青坊坐陪講宮壺滿賜霑恩輝

草茅被寵已踰分不才寧免誚與譏海鳥那知享鐘鼓
野馬終懼遭籠轡江湖浩蕩故山遠歸夢每逐鴻南飛
常時出院就空館僮僕愁對語者稀知君在舍亦岑寂
歲暮雨雪吟蛭蟻今宵得見信可樂如獲美饌飽我飢
但憂兄弟尚遠隔言笑未了仍歔歔何當乞還棄手版
重理吳榜尋漁磯門前親種一頃稻婢供井臼妻鳴機
秋來租稅送縣畢邨酒可醉雞豚肥誰言此願未易遂
聖澤甚沛寧終違

北山觀猿

黑衣公子何婀娜飛挂枯梢不愁墮幾迴呼下白雲間
拋賜曾嘗內園果家鄉何處是巴西回首煙蘿望欲迷
料得孤舟江上客月明少聽一聲啼

客舍雨中聽江卿吹簫

客中久不聞絲竹此夕逢君吹紫玉斷猿哀鴈總驚啼
我亦無端淚相續數聲嫋嫋復嗚嗚散入寒雲細欲無
愁望洞庭空落木夢遊秦苑總荒蕪曲中只訴君心苦

不道人聽更淒楚關山燈下歎羈臣江浦舟中泣嫠婦
憶昨閨門費酒貲玉人邀坐弄參差彩霞深院花開處
明月高樓鶴去時如今忽在他鄉外風雨寒窗兩憔悴
恨無百斛金陵春同上鳳凰臺上醉始知嶰谷枯篁枝
中有人間無限悲願君袖歸挂高壁莫更相逢容易吹
謝友人惠兜羅被歌

蠻工細擘冰蠶繭織得長衾謝縫剪蒙茸柳絮不愁吹
鋪壓高牀夜香軟朔風入闕凋白榆塞寒此物時當須

明燈熾炭夕宴罷薦寢宜共紅氍毹海客揚帆遊萬里
得自崑崙國中市歸來遺我見遠情重似鴛鴦合歡綺
詩人鶴骨欺霜稜曾直禁署眠青綾自從身退得閒臥
只愛擁紙同山僧今朝得此何奇絕展覆不憂兒踏裂
便思清夢伴梅花靜掩寒窓聽風雪越羅蜀錦安可常
洞房美女謾熏香誰知一幅春雲煖即是溫柔堪老鄉
會宿成均汲玉兔泉煮茗諸君聯句不就因戲

呈宋學士

白兔如嫌桂宮冷走入杏花壇下井嫦娥無伴每相尋
水底亭亭落孤影曾搗秋風玉白霜至今泉味帶天香
玉堂仙翁欲飲客鹿盧夜半響空廊齋燈明滅茶煙裏
醉魂忽醒松風起只愁詩就失彌明殘雪滿庭寒似水

大全集卷九

欽定四庫全書薈要卷一萬六千六百二十一

集部

大全集卷十

明高啟撰

七言古詩

題美人對鏡圖

曉院鹿盧鳴露井
玉人夢斷梨雲冷
起開妝閣笑窺奩
月裏分明見娥影
自對猶憐況主家
春風一面斷腸花
何由鑄入青銅內
不遣秋霜換娥翠

送曹生歸新安山中

黃山西來九華連，巖洞翕忽通雲煙。
白鵝嶺下煉丹處，瑤草獨秀今千年。
三十六峰在青天，仰面歷數舉馬鞭。
高林雜樹多未識，風雨一過俱蔥芊。
山深何物尤可憐，秋禽幽鳴巧如絃。
路迴澗阻似無地，中有蒔藥千家田。
雲間雞犬隔流水，居人彷彿皆神仙。
我欲窮遊久無緣，羨君忽去尋歸船。
猿聲兩岸谿幾曲，白沙明月相迴沿。
到時西峰草堂前，應有攜酒來華顛。
山人不喜說朝市。

但說久別情依然塵埃舊褐便可脫濯費十斛山中泉
爲予淨掃石上葉早晚有意來高眠

曉出城東門聞櫓聲

城門朝開路臨水人語煙中近魚市誰搖飛櫓入蒼茫
帶夢驚鳧柳邊起過處寒波動拍沙遠聞嘔軋復咿啞
征夫車轉山頭阪工女機鳴竹外家我身本是江湖客
偶墮黃塵曉行役此聲空憶舊曾聽舟中酒醒東方白

詠苑中秦吉了

不獨能言異凡鳥最愛佳名呼吉了雕籠幾度學雞鳴
驚起煙花六宮曉駕來別院未知迎先聽遙呼萬歲聲
願把春風一杯酒從今莫聽上林鶯

夏珪風雪歸莊圖

江雲粘波晚模糊青山忽失如亡逋乾坤瑩淨冰作壺
春意散入千林枯野橋古渡行人無清響瑟索鳴殘蘆
江天萬里一老夫短蓑如蝟舟如鳧魚寒入泥不上眾
歸來遠識漁邨孤柴門夜叩聞犬呼逕竹壓折誰相扶

山妻自炊稚子沽不羨炙肉圍紅爐嗟予客遊歲屢徂
詩囊隨驢走髯奴長安何處覓酒徒飛花撲頭帽不烏
旅舍無夢還江湖慙對風雪歸莊園

始歸江上夜聞吳生歌因憶前歲別時

前年月夜聞君唱秋滿蘆花此江上一聲離思水茫然
雲逐孤帆共搖颺驚魚噴浪棲鷗飛木葉散落風吹衣
蓮歌盡歇松陵浦漁笛還沈笠澤磯停杯數到臨終拍
露下無聲斜漢白滿船相送盡淒然況我當爲遠行客

解紱今年別紫宸歸舟江上又逢君一尊重聽當年曲
相對渾疑夢裏聞東方欲曙餘聲絕悲喜盈襟竟誰說
願長把酒聽君歌從此天涯少離別

題董元卧沙龍圖

人間滴罷天瓢水歸護玄珠卧沙裏空潭白日不聞雷
雲霧俄隨轉身起誰言北苑筆意精頭角破屋將飛騰
細看圖畫何須恐曾謁真龍遊太清

松隱爲戴叔能賦

江邊柳樹谿邊花晉處士宅秦人家秋風忽來春雨過
坐看衰落俱堪嗟山中相依歲年久羨君獨結蒼髯叟
短褐長鑱不解耕茯苓作食花爲酒我今身似浮雲閒
正合著在長林間明朝儻許同棲泊便擬飛隨白鶴還
蕭山尹明府吳越兩山亭

憶昔看山吳越遊酒酣鼓棹江中流左招舞鳳來百里
右顧卧龍橫半州崢嶸兩勢不相下氛翳淨掃當高秋
文身烏喙昔分處有國本是名諸侯區區仁暴固無異

朝吞暮并山應羞不知千載竟誰主伯氣倏與飛煙收
邇來此地有兵甲風景頗似當年愁黃雲蔽天道路遠
我欲再尋應莫由聞君作亭壓此境坐獲衆勝非窮搜
江長不隔飛鳥渡峰多欲障斜陽留廢興自古屬造化
登臨未須生百憂但當矯首望東海一杯笑舉邀浮丘
贈賣墨陶叟

龍井老人稱墨仙有家近在荆谿邊鐵臼秋鳴竹屋雨
瓦溝春掃桐窗煙玄玉初成敢輕用萬里豹囊曾入貢

日長小殿試烏絲光迸驪珠欲浮動世間潘李今已無
黃金滿篋爭來沽詞臣供寫上林賦畫史藉作瀛洲圖
文物年來頗凋弊喪亂誰言少知貴便須從子乞雙螺
醉草檄書磨楯鼻

虎丘行次朱賞靜見寄韻

我謀我隱西郭西讀書坐覺長身低出門到寺纔數里
野水沙竹生秋輝恨無酒舫漾落日百錢行自懸青藜
時危未卜人安宅幸遇勝地須扳躋山中况逢暑雨過

枇杷樹高陰滿池興來即遊興盡返迎送豈要山僧知
兩崖石根下插水綠藤倒拂風生漪空堂朝鼓起龍蟄
高塔夜鈴驚鶻棲人生在世本爲客隨意且留何必歸
丘陵莫歎今日異城郭更恐他年非蒼茫萬事孰可問
孤鳥已沒空煙霏念君不遊何所爲作字寄我如張芝
真娘有靈應大笑把酒豈不延題詩秋風今朝動江浦
掛席正是當年期與君一弔興廢迹荒臺古樹聞烏啼

鳳臺三益圖

元集賢院待制馮海粟公自號瀛洲客嘗被斥
遊金陵鳳凰臺作詩弔李謫仙好事者爲作鳳
凰臺遊圖近有詩示求題賦此塞之

謫仙昔作供奉臣詩語不合妃子嗔鑾坡無地容侍直
錦袍來醉金陵春金陵臺高鳳凰去西望長安竟何處
江聲空打石城潮山色猶橫歷陽樹騎鯨一去五百秋
花草滿逕埋春愁瀛洲老客綠玉杖笑領賓客還來遊
才氣風流頗同調曾入金門待明詔當年流落不自悲

却問前人欲相弔可憐二子遭清時放逐江海空題詩
賴有高名足難朽何用粉墨他年垂夕陽欄檻登臨後
誰復來遊酹杯酒屐痕寂寞隱蒼苔棲鳥啼滿臺前柳
送張負外從軍粵上

鷗雞啼霜海城白誰掃行車出南陌刀頭裝得願酬恩
知是狂遊廣州客擊筑悲歌斗酒前又從飛將去臨邊
幕中草檄風生筆馬上吟詩月在韉秋聲萬里隨征鴈
南北長江竟誰限明朝若上越王臺應有中原陸沈歎

題陳節婦

節婦姓孫郡人陳已久之妻也已久客死節婦
守志其孫彥遜求題賦此

嬌兒笑語羅幃暮銀燭搖光夜香度狂風忽起海東頭
吹斷蘭舟去時路去時豈惜千金軀煙濤竟沒珊瑚樹
精衛冤深水更深身小天高向誰訴寂寞塵奩掩鏡光
可憐不復照晨妝階前莫剪青青草生死終身不下堂
堂中素幔空時祭賴有孤兒拜虛位白日哀思眼不乾

夜枕還流夢中淚妾本孤桐斷作琴一絃只作一絃音
逢人不作鳳凰曲別鶴離鸞夜夜心

晚步西郊見鴛鴦群飛

平煙漠漠天蒼蒼牛羊不牧野草黃鴛鴦東來高作行
晴空忽墮數點霜紫塞碧海遙相望下視鳬鴨愁陂塘
書生見此心欲狂便思呼鷗上馬馳鷗鷖之裘自倒披
箭聲脫弦鳴餓鷗遠翮正落雙參差仰空拍手誇絕奇
豪氣服殺并州兒也勝閉門坐詠詩

次韻楊孟載早春見寄

雪後西園韭初剪流澌晚動春塘淺閉門有客抱深愁
久不題詩硯生蘚風塵健兒誇得意獨坐寂寥誰所遣
應緣少學與時違不習弓刀誦文典城中物貴市門靜
好事猶能具盃斝琴堂朝夕共清歡舉白頻浮不容免
鈴騶已遊賓客醉深夜垣扉罷扃鍵一燈留照對牀談
沸鼎松聲烹綠薺五更上馬子先去擁被獨眠牕日曉
起聞啼鳥忽興發欲往江邊雲隔巘人家舊燕盡巢林

草滿長洲絕遊輦春耕咫尺阻歸計野水自流閒澮畝
吾鄉繁華天下稀花柳邛邛隨步轉久聞離亂今始見
煙火高低變峰巒登臨吹笛散群羌此事空嗟千古鮮
朝來風雨況淒黯雨溼城頭旗不展鄰里銜泥備役夫
縣官不召憐疲喘安居且復俟時寧出豈無能非退卷
范莊紅杏幾株在好待開時同折撚對花憂患不須言
剩喚一杯供脚軟

鹿

日煖呦呦草際鳴
養馴未省見人驚
雲山別却銜芝侶
來向朱欄花下行
舊毛雪白新茸綠
曾在宜春苑中畜
幾人逐走向中原
輸與吾皇稱疾足

詠雪禁體次徐文學韻

邊城雪埋深沒斡
風旋餘花吹酒盃
幾人遮虜渡冰河
直指彎弓不能滿
我方高枕聽蕭瑟
却喜今年瘴全浣
寒添柳院覺春遲
明透竹窗驚夜短
未成豪飲圍翠袖
且辦清吟呵象管
鋪庭擁路掃難開
三日不消知待伴

翻疑塞北雲正冷可信江南地先煖
愁封小窟僵蟄蟲
驚折危柯殞巢卵林中樵絕暮無煙
野外獵來晨有曠
趙女依稀舞態斜郢人寂寞歌聲斷
此時自歎少清歡
月下閑門誰解欵山陰老客雖苦病
放曠還能類中散
長須踏雪送詩筒白戰令嚴烏敢緩
開簾尚恨不同賞
醉看帽敝仍褻袒祇期明日有晴暎
遠訪梅花須勿懶

思夫山

江上曾看望夫石湖中望見憶夫山
夫君好采山中藥

獨得長生竟不還不似蕭郎與秦女乘鸞同去彩雲間
題陶生兼寄周記室

馬頭交語臨長陌我手持杯君揖策官槐風起咽秋蟬
日暮偏傷遠行客故鄉故人離別多過江相見問如何
軍中莫笑書生怯還有能當曳落河

倒挂

綠衣小鳳啼愁罷瘦影翻懸桂枝下芙蓉帳裏篆消時
解斂餘香散中夜鐘鼓迢迢鎖禁門宵衣未得奉明恩

五更香冷羅浮月相憶梅花應斷魂

苦寒書江上主人壁間

慘節欲盡郊原空北風五日吹沙蓬客子東遊骨肉遠
主人賴有江邊翁青燈白酒同傾瀉醉擁布衾茅屋下
中宵不敢愁苦寒猶有窮年遠行者

菜薺爲余唐卿賦

柱桐里中君始歸菜花滿園黃蜂飛桔槔倚樹長不用
江南雨多山土肥方畦獨遶看新綠晚食何須尚思肉

翠縷登盤春薤香金釵出盎冬菹熟我家亦在萼菰鄉
秋風便應歸共嘗潮州司馬成何事回首空愁足萬羊
送張進士會試

國家文治今百年多士孰賚皆知天南宮坐試二三策
能使海內無遺賢院門晨開官燭爛白袍鵠立人三千
上談禮樂祖姬孔下議制度輕讎玄臨軒曾看宰相賀
雲瑞盡見當臚傳看花或騎太僕馬錫宴每給司農錢
登朝出牧知幾輩冠佩劒烏紛相聯邇來國運屬中圯

爭慕死節羞生全潯陽老守鬚汗赤山東大將魂沉淵
迺知儒術王政本至此尚賴扶傾顛諸生區區抱遺籍
草萊竄亡亦可憐南方上公境獨治鹿鳴更欲興賓筵
入場叉手萬言就衆目一葉驚先穿嚴裝又隨計吏發
京城遠瞻北斗連秋風吹雲別酒冷枯楊淺水閭門邊
君行勿亟我有語落日正在車衡縣竊聞天子正側席
此去爲拜彤庭前揮毫休奏醴泉頌給札莫賦凌雲篇
但當開口論世事號令次第宜何先坐令王綱復大正

乾樞共仰天中旋我今有志未能往矯首萬里雲茫然
明月舟

秦郵呂彥行題所寓室曰明月舟蓋取覽社湖
中有明月之句也

明月非月舟非舟問君乘之何所遊風多浪高徧處有
日暮欲渡令人愁此鄉偶似淮南佳醉客每來歌白苧
夜深天黑夢神光幾箇驚鳥落高樹君才照國不照車
何用高隱江湖居嗟予未識青藜杖願借舟中臥讀書

聽南康陳協律彈楚歌

我聞楚客彈楚聲初絃一揮邊馬驚鳴咽哀音動寒月
正如歌發漢軍營營中一曲還漸理想見彷徨帳中起
美人掩泣壯士悲寶劍無光黯秋水淒涼疊弄悄欲終
應憐歸騎阻江東蓋世英雄竟如此遺調空留感人耳
四座相逢今夜聽霜風忽來庭樹零無言有愁俱酒醒

京師苦寒

北風忽發浮雲昏積陰慘慘愁乾坤龍蛇蟄泥獸入穴

怪石凍裂生皴痕臨滄觀下飛雪滿橫江渡口驚濤奔
空山萬木盡立死未覺陽氣回深根茅檐老父坐無褐
舉首但望開朝暎苦寒如此豈宜客嗟我歲晚飄羈魂
尋常在舍信可樂牀頭每有松醪存山中炭賤地爐煖
兒女環坐忘卑尊鳥飛亦斷况來友十日不敢開衡門
竭來京師每晨出強逐車馬朝天閣歸時顏色黧如土
破屋暝作飢鳶蹲陌頭酒價雖苦貴一斗三百誰能論
急呼取醉徑高臥布被絮薄終難溫却思健兒戍西北

千里積雪連崑崙河冰踏碎馬蹄熱夜斫堅壘收羌渾
書生只解弄口頰無力可報朝廷恩不如早上乞身疏
一蓑歸釣江南邨

約諸君遊范園看杏花

去年春色近清明萬匝煙花夾曉城西苑相逢車馬問
何人不是踏春行今年人迷去年道風雨不來花自掃
僧寺庭空半紫苔侯家宅廢皆青草縱然無主一株存
憔悴塵沙不可論野外日斜啼鳥散消愁無處却消魂

魏公園林芳塢下聞有柔枝正堪把休言亂後少花看
得到花前人亦寡明日尋君君莫違共隨遊蝶弄晴暉
閉門夢斷江南晚忍見迢迢春自歸

南州野人爲吳邑曾令賦

南州沃壤惟泥塗清泉流渠歲不枯若人抱耒斲水上
始志自比躬耕徒幸逢堯舜可在野起綰墨綬來東吳
一鞭不驅雨後犢兩鳥已化空中鳬郭西春朝布穀語
柔柔綠雲連太湖下車殷勤問父老勸耕爲汝犁先扶

我本野人偶叨祿向汝未忍施鞭蒲五風十雨和氣應
勿遣寸土生蒿蕪太平邨落雞犬靜社飲自足歡妻孥
但當相率了官務莫勞縣吏來催租民言此令善教我
斗酒相壽歌鳴鳴共問野人竟誰是堂中鳴琴賢大夫
欲訪李孝廉至婁江遇風而回

船頭曉日浮江面東望青山是婁縣尋君此去愛潮平
出浦那知風色變雲煙翕忽波浪湧咫尺漁邨已難見
高樹巢傾鸛鵲愁深潭窟陟龍戰舟師挨舵苦無力

帆勢如蓬幾飄轉中流不進却歸來握手何由遂初願
人生會合應有時天意茫茫吾敢怨

夜泛湖至東舍

漁邨港頭初月上鷺鴨不收菰荻響隔湖煙寺遠鐘來
居人盡歸吾獨往寒風蕭蕭寒浪生舟中欠載酒壺行
東家未宿如相待黃葉青燈機杼鳴

午日有懷彥正幼文

去年歸鄉過重午柳雨莎風滿南浦白蓮閣上與君吟

遙憶徐君隔淮楚今年風雨又端陽却在秦淮憶故鄉
徐君已歸若相見應言前事一淒涼客愁欲斷翻長笑
人事推遷古難料明年未省又何之一杯且聽江南調

鷗捕魚

秋江水冷無人渡群鷗忍飢愁日暮白頭來往似漁翁
心思捕魚江水中眼明見魚深出水復恐魚驚隱蘆葦
須臾銜得上平沙鱗鬣半吞猶見尾江魚食盡身不肥
平生求飽苦多飢却猜人少忌機者海上相逢不飛下

泉南兩義士歌

泉南兩士陳與孫少小相約爲弟昆
合踈成戚契誼重異木纏結如同根
升堂握手出肺腑交拜二母開壘樽
具舟期賈海外域欲渡夷熨窮崑崙
滄溟東望浸天爛颶風怒攪波濤
渾天吳恍惚出怖客掀舞蛟鰐飛鵬
鷗孫言陳宗惟子在遠涉巨險吾宜
奔汝親頭白倚門切慎勿輕去違晨
昏相讓不得乃更往挂席遙指扶桑
瞰望山行覓島中國卉服通譯侏儻
言尋煙暮投薜荔屋

趁墟晝集枕榔邨年還家喜得寶木難火齊并瑤琨
探囊用取兩不較屑屑彼我誰復論急難相援誓終始
歲時燕慶烹羔豚義風久已動殊俗椎結相見知欽尊
我聞同氣有爭利閭牆往往隳家門又看結交許歲晚
盟盤未撤渝情恩管鮑居貧乃共濟餘耳得勢終相吞
若茲二子古亦少簡牘可使他年存作歌爲繼王子傳
薄俗視此應堪敦

節婦吟

城頭黑雲如破屋車走爭門折千軸姚家新婦亦東逃
舅姑驚惶兒女嗥自知數口難俱免欲渡前谿舟尚遠
囑夫棄妾當奉親獨赴清流不愛身此日誰能問南史
如婦曾書幾人死

立秋前三日過周南飲雷雨大作醉後走筆書
壁間

周郎乃是同鄉友亂後相逢驚老醜日斜邀我話舊遊
爲喚金陵白門酒一杯乍解羈旅顏兩杯漸沃粘吟口

三杯不覺已陶然此身竟到無何有青天俄忽震霹靂
白浪翻江怒蛟吼急雨爭鳴池上荷狂風已折門前柳
醉中相對正坐忘七箸何須驚落手家人喧呼水入戶
顛倒屋茅隨地走牀牀避漏且莫歎旱氣方除賀田叟
蓐收預到三日前淨掃炎氛去如帚黃昏泥潦歸未得
呼燭相留卧東牖夜深酒醒起獨行雲散城頭見星斗
乃知天變只須臾人在艱難豈云久

送張倅之雲間

鱸鄉亭前楓葉稀讀書堆下征鴈飛孤城迢遞秋色裏
作官自好休思歸扁舟晚待潮東去琴鶴由來是家具
別意方留江上杯離心已挂雲間樹如此風流一使君
文章政事更何云絕憐退食兼榮養不向山頭望白雲

送王孝廉遊京歸錢塘

江南草長蝴蝶飛玉缸碧酒流春輝相逢上客同買醉
白馬新自燕山歸燕山歸來不堪說易水寒風薊門雪
朝邸空隨使者車帝閭不受書生謁笳聲杳渺歌苦辛

短衣笑拂京華塵不留東閣觀奇士還覓西湖別故人
此行莫歎知音寡曾到黃金舊臺下荒臺遺址今已平
更有何人致賢者

望月臺

臺前夜半烏啼時起望明月彈商絲月來照見臺上影
松桂滿山風露冷

愛竹軒爲陳維寅賦

匡山老客何清真自繞園屋栽蒼筠年來無肉雖苦瘦

家有萬玉誰言貧一竿護惜不忍剪何以持釣橫江鱗
僮來掃葉自可喜客至踏筍長遭嗔輶輶啼罷結遠夢
碧雲忽墮湘南春涼陰脩脩潤琴硯落翠冉冉沾衣巾
詩成時向節下寫醉墨點破煙痕新風來清嘯與相答
若聽金奏怡我神知無顏色媚兒女自古相愛惟幽人
洛陽陌上花易過歌鐘競賞勞車輪何如此君最耐久
歲晚結托同情親亂聲朝送簾外雨踈影夜拂窗前塵
我嘗種此欲免俗亂後伐盡惟荆榛故園咫尺未能去

移家幸得爲子鄰往來儻許如二仲敲門借看毋嫌頻

釣雪灘

江流欲澌魚不起一蓑猶釣寒蘆裏漁邨茫茫煙火微
雪滿晚篷人獨歸

幻住精舍尋梅

郭西雪後尋僧院短竹穿沙水如練梅花有待我來催
十日春寒未開遍忽思前日渡江水夜解征帆宿山縣
偶逢一樹在官廨爲寫新詩冰滿硯關山夢別今五年

縞袂誰家月中見自慙喪亂尚飄泊淚眼如看故人面
黃昏酒醒逐寒影繞樹千迴意無倦南枝北枝亂如雪
未許東風吹一片名園桃李盡荆榛空谷獨開君莫怨
重來省視兩何如惆悵歸時有餘戀

北郭秋夜喜徐卿遠來兼南遊

東海徐君我同里日共周旋接冠履斯人自是真可人
不見心憂見之喜豈容遠別間山岳兩歲僅收書一紙
頗聞微祿不自養霧雨南方疫時起誰能忽送千里來

應有飛鴻渡江水蟲聲今夜空館涼秉燭相看疑夢裏
瓊枝何以失舊色客路風塵亦勞矣我今不解出門行
病眼流眵肉生髀與奪得喪未足較惟有一貧聊復爾
暫來即去何使然撫琴東西覓知己當時結交豈不多
下車相揖今無幾願君窮達存此心勿使千年笑餘耳
次韻荅朱冠軍遊城西之作

前年城西作冶遊柳條拂蓋花迷舟笑看明月問狂客
我舉大白君當浮去年城西復偶住酒伴家家邀即去

東隣寺裏花正開半醉半醒遊幾度今年有花愁獨尋
閉門三日卧春陰將軍小隊遊何處日暮空聽車馬音
皋橋秦娘殊窈窕爲我喚來歌水調客愁草草不易除
世事茫茫本難料玉壺一雙秋露傾唯此可以忘吾情
醉歸共射草中石笑劈弓弦霹靂鳴

贈步鍊師禱雨

白頭道士騎一鶴手把青蓮下寥廓人間又見海田枯
十丈黃塵沒城郭昔年服事茅長君能役鬼神呼風雲

下爲群生掃旱沴雨工驅起如羊群陰雷填填天欲怒
靈飈吹旗紫壇暮書入重關虎豹開辟沉古井蛟龍護
須臾甘澍何滂沱十日不雨應無禾祠官空爲大雩舞
覲女羞作迎神歌明朝師歸定何許雲裏懸珠火如黍
更煩夜起把天瓢翻作東南洗兵雨

題朱澤民荆南舊業圖

睢陽醉磨一斗墨夢洛荆南寫秋色大陰垂雨尚淋漓
哀壑回風更蕭瑟楓林思入煙霧清湖水愁翻浪波白

谿上初逢野老航
山中遠見先生宅
秫田半頃連茅區
茅屋三間倚蘿薜
僧來看竹乘小輿
客去尋苓借高屐
任公臺下石可坐
周侯廟前路曾識
虎迹時留暮苔紫
蛟氣或化秋雲黑
城郭當年別已久
風塵此日歸不得
落日書齋半壁明
圖畫卧對空相憶

月支王頭飲器歌

磧中萬騎驕嘶雪
頭挂金鞍敵初滅
歸來添作太白盃
胡酒寒凝色如血
故國無瑩歸夢迷
朽骨飲恨空如泥

金
卷十
琵琶聲中鬼語雜酥燈照夜風淒淒崑崙倒瀉黃河入
袍汗淋漓疑淚溼部落誰酌國士恩尊前一夜無聲泣
烏孫降王猶疾首起奉單于千萬壽

海石爲張記室賦

大星墮水聲若吼祖龍夜叱神羊走誰將五色補天餘
屹障狂瀾歲時久空憐山頭精衛鳥自隨風波衝不了
媧皇去後幾桑田鰲背靈峰一拳小

張中丞廟

延秋門上烏啼霜
羯奴曉登天子牀
江頭老臣淚暗滴
萬乘西去闕山長
公卿相率作降虜
草間拜泣如群羊
當時不識顏平原
豈復知有張睢陽
孤城落日百戰後
瘦馬食尾人裹瘡
男兒竟爲忠義死
碧血滿地嗟誰藏
賀蘭不斬上方劍
英雄有恨何時忘
千年海上見祠廟
古苔叢木秋風荒
摩挲畫壁塵網裏
勇氣熒熒虬髯張
巫歌大招客酹酒
忠魂或能來故鄉

大全集卷十



總校官庶吉士臣張能照

校對官檢討臣蕭九成

謄錄監生臣朱文佐